

四庫全書

子部

欽定四庫全書

古今姓氏書辨證卷二

宋 鄧名世 撰

一東下

東郭

出自姜姓齊公族大夫居東郭南郭北郭者皆以地
為氏春秋時齊有東郭書又東郭賈字子方食邑大
陸謂之大陸子方

東里

莊子鄭之東里多才蓋七穆所居論語言東里子產是也其支庶或以為氏

東宮

元和姓纂曰東宮棄疾隱嵩山年三百歲謹按此必其先出於列國世子居東宮而不得立者其後因以為氏如大夫之氏於南宮北宮也姓纂又云齊大夫東宮得臣誤矣春秋時齊公子得臣為世子不敢居上位常居東宮故傳稱衛莊姜曰東宮得臣之妹詩

亦曰東宮之妹非得臣以東宮為氏

東門

出自姬姓魯莊公之子遂為卿居魯東門因氏焉謂之東門襄仲其子歸父以國討奔齊列子有東門吳漢孝武時善相馬者東門京鑄銅馬式獻之有詔立於魯班門外事具馬援傳又有琅瑯東門雲學嚴氏春秋官至荊門刺史

東陵

風俗通秦東陵侯邵平之後又齊景公時有隱居東陵者氏焉神仙傳有東陵聖母謹按漢地里志廣陵縣有東陵亭即盜跖死利於其上之地也博物志曰女子杜姜左道通神縣以為妖閑獄桎梏卒變形莫知所極以狀上因以其處為廟祠號曰東陵聖母然則聖母不氏於東陵特邵氏齊人之說可據

東關

風俗通晉有東關嬖五漢有將軍北亭侯東關義謹

按春秋東關晉之門名其先晉守關大夫以地為氏而義即其後特不可曰嬖五後也左傳曰外嬖梁五與東關嬖五晉人謂之二五蓋晉獻公時有東關嬖人名五而失其姓應劭以嬖五為名誤矣

東方

梁有宿豫士人東方光唐貞觀中定德州平原郡八姓其一東方氏也唐末有行營都統東方達為使相東閭

姓苑云古賢者有東閭子謹按左氏傳東閭齊之門
名所謂州綽門于東閭者當時大夫以所居為氏

東鄉

世本曰宋大夫東鄉為之後賈執英賢傳曰漢井州
護軍東鄉子琴高密人唐藝文志有東鄉助著周易
物象釋疑

東陽

元和姓纂云祖氏家傳祖崇之娶東陽元旋女又宋

員外郎東陽無疑撰齊諧記十卷謹按春秋左氏傳
魯齊晉皆有東陽魯之東陽在泰山南齊之東陽近
萊晉之東陽在魏郡廣平以北今婺州屬縣亦有東
陽必其先列國大夫有以邑為氏者

東丹

五代時契丹阿保機長子突欲為東丹王及德光立
突欲奔唐唐明宗賜姓東丹名慕華後更姓名曰李
贊華

東野

莊子有善御者東野稷一名畢事魯莊公謹按春秋
左傳東野魯地必稷之先為氏宋有殿中丞東野春
東萊

謹按東萊後世以為郡名必秦漢以來人以地為氏
同蹄

本西羌人唐孝友傳永徽初有同官人同蹄智壽父
為族人所殺智壽與弟智爽候諸塗擊殺之今望出

渤海

同官

元和姓纂曰出姓苑謹按同官縣名也必其先以邑為氏

桐里

元和姓纂曰漢御史中謁者桐里斥生儒為議郎謹按桐相二字相類而斥亦作相里氏未知孰是也

桐門

桐門宋城北門也元和姓纂有此氏今著其說

銅鞮

謹按春秋晉羊舌赤食采銅鞮謂之銅鞮伯華及羊舌氏亡以樂霄為銅鞮大夫其地上黨銅鞮縣是也二人之後必有為氏者元和姓纂始收此氏今從之中行

出自荀氏晉公族逝教生荀林父晉文公作三行以禦狄林父將中行謂之中行桓子以官為氏桓子生

庚及獻子偃字伯游偃生穆子吳吳生父子寅其族
有中行喜

中央

姓解曰中央氏古帝號其後以為姓

中英

元和姓纂曰古帝少昊氏有六英之樂掌中英者以
官為氏

中梁

英賢傳云古隱者中梁子之後謹按古字中仲通用
必仲梁氏之後也

中叔

中叔圉之後晉有中叔無忌漢光武時御史中叔僚
謹按古文中與仲通用

中壘

元和姓纂曰風俗通劉向為漢中壘校尉支孫以官
為氏

終葵

春秋左傳魯定公四年成王封康叔於衛分以商民七族其一曰終葵氏

終古

元和姓纂風俗通桀內史終古後氏焉

戎子

元和姓纂曰戎子駒支之後為氏謹按世無此氏而春秋之時齊靈公之妾亦謂之戎子何獨駒支後乃



為氏乎

弓里

後漢獨行傳建封二年騎都尉弓里戍將兵平定幽州謹按弓里當為戍之氏

宮孫

漢藝文志有宮孫子著書師古曰宮孫姓也不知名或云室孫氏室訛為宮

熊相

春秋時楚大夫有熊相宜僚熊相謀賈執英賢傳有
楚懷王將軍熊相沂

熊率

元和姓纂曰楚熊率且比後為氏

公治

出自姬姓季氏之族子曰季治字公治為季氏屬大
夫魯襄公二十九年自楚還季武子使公治問公公
賜之冕服子孫榮之以字為氏故定哀間有公治長

字子長為孔子弟子孔子以其子妻之即其孫也原
此氏所出者今詳著之

公乘

漢陳餘娶趙苦陘富人公乘氏女又湖三老公乘興
訟王尊治京兆功效後漢更始有左輔都尉公乘翕
新唐史公乘億字壽山登咸通進士第魏博樂彥貞
喜儒引在幕府有詩賦二集

公孫

黃帝之後無人而春秋時國君之孫皆謂之公孫秦
公孫枝字子桑晉公孫杵臼孔子弟子公孫龍字子
石皆以公孫為氏前漢紀平帝元始元年封周公後
公孫相如為褒魯侯恩澤表曰節侯公子寬以周公
後魯頃公孫之玄孫奉周祀為褒魯侯二千戶元年
六月丙午封十一月侯相如嗣更姓公孫氏後更改
為姬氏然則後世公子公孫之氏當以漢史為正後
漢玄菟太守公孫域擊破夫餘遼東兵馬公孫輔以

身扞太守俱沒于陣南燕有侍中公孫五樓專總朝政兄冠軍將軍常山公歸叔父武衛將軍興樂公頽公西

孔子弟子公西赤字子華公西輿如字子上公西蒧字子皙皆魯人邵氏姓解以赤與華為二人誤甚矣公叔

出自姬姓衛獻公少子發國人謂之公叔因以為氏所謂公叔文子者也文子生公叔戌以罪奔魯亦作

未禮記又作叔木

公子

元和姓纂曰春秋列國公子之後此知其說而未詳者今以漢史公子寬事為正

公羊

齊公羊高子夏弟子作春秋傳又公羊買始為鑿巾

以飯

案疑有誤字

公析

元和姓纂曰衛穆公生公析黑臀其孫成子朱鉏以
王父字為氏謹按春秋傳衛侯之弟黑臀字子叔別
為子叔氏其孫析成子亦不以公析為氏未知林氏
何據也

公劉

姓苑曰后稷之祖有公劉氏誤矣古無此氏而公劉
乃后稷之孫非其祖也此訛誤顯然者不可不正今
駁去

公肩

孔子弟子公肩定字子中魯人

公牛

姓源韻譜曰其先齊公子牛之後淮南子有公牛哀
病七日化為虎

公師

出自姬姓後漢功臣表有公師壹劉聰有太中大夫
公師彧

公旗

世本齊威公時有左執法公旗蕃姓源韻譜曰齊悼公子子旗之後

公右

姓苑曰高平人謹按春秋國君戎右謂之公右如魯猷孫之類必有以世官為氏者

公巫

魯大夫有公巫召伯仲其後以官為氏

公仲

子華子曰程子聚徒著書門人之著書者曰公仲承最能傳其道與留務滋同學務滋即鬼谷子也

公禱

或作公禱漢藝文志有公禱生終始十四篇師古曰禱音疇其字從木傳黃帝終始之術

公族

東漢郭泰傳有公族進階其先出自晉公族大夫之

後春秋時驪姬亂晉詛無畜羣公子自是晉無公族
及成公自周歸晉始官卿之適子以為公族故趙盾
請以括為公族韓厥子無忌謂之公族穆子范鞅與
欒盈為公族大夫而不相能其後遂有以官為氏者
公孟

出自姬姓衛襄公生公子縶字公孟以疾不得嗣其
孫彊以王父字為氏其宗人奔齊為公孟綽

公他

世本曰有蒲邑大夫公他世卿其先以王父字為氏
公玉

漢郊祀志濟南人公玉帶上黃帝時明堂圖師古曰
呂氏春秋齊有公玉丹此蓋其舊而說者讀玉為宿
非也

公泥

姓解曰左傳季武子庶子公泥氏誤矣謹按左傳季
公鉏一名公彌未嘗有公泥氏泥彌聲訛也今駁去

公綦

謹按後漢中平四年漁陽人張純殺護烏丸校尉公綦稠則公綦人氏也姓書未收今增入

公舌

姓解曰左傳晉大夫有公舌赤誤矣謹按古無公舌氏而晉大夫乃羊舌赤蓋羊公二字之誤今駁去

公帥

本公師氏避晉景帝諱改焉晉成都王帳下有公帥

著

公甲

魯哀公二年大夫公甲叔子與析朱鉏戰吳人于夷
吳人獲叔子邵氏姓解以公甲叔及公甲叔子為二
人誤矣今駁去公甲氏

公明

衛有公明賈為公叔文子屬大夫孟子弟子有公明

儀公明高

紫樞弓疏公明儀乃子張弟子此作孟子弟子未知何據

公斂

魯大夫公斂陽字處父為孟氏成宰能逐陽虎

公上

古有公上不害南齊有晉陵令公上延孫為南沙人
范脩化所殺

公山

左傳魯人公山不狃以費畔季氏而奔吳為大夫不

狃字子洩

公罔

孔子弟子有公罔之裘鬻相之射嘗使揚解

公齊

元和姓纂孔子弟子有公齊定謹按家語史記無此

人未知何據

按公齊定疑即
公肩定之訛

公牽

姓解曰世本齊公子牽之後有公牽氏

公仇

姓苑曰後漢零陵太守公仇稱出自晉穆侯太子仇之後為公仇氏

公幹

古今人表有公幹仕齊為大夫後氏焉

公之

元和姓纂曰季悼子生憲伯鞅鞅生懿伯柎為公之

氏

公勝

前漢藝文志技巧家有公勝子五篇

公城

南史王弘少嘗擣蒲于野舍及後當權有人就弘求
縣此人嘗以擣蒲戲得罪弘詰之曰君得錢會戲何
用祿為答曰不審公城子野何所在弘默然

公若

出自姬姓季武子之子公亥字公若其孫藐以王父
字為氏

公緒

後漢黨錮傳公緒恭為八顧注公緒姓也

公儀

列子周宣王時有公儀伯以力聞諸侯其後有魯相公儀休又有公儀仲子舍其孫而立其子禮記檀弓

注曰公儀蓋魯同姓

公皙

史記家語有孔子弟子公皙哀邵氏姓解以為公析

哀蓋祈析二字相近而林邵二家之說容有一誤今附見之

公輸

魯有公輸般為工師孟子所謂公輸子之巧者其孫曰公輸若遂氏焉

公丘

子思子有公丘懿子衛人與子思論人主自臧則衆謀不進事

公思

魯季氏之族曰公思展後人以字為氏

公襄

世本曰魯大夫公襄昭魯襄公太子子野之後

公戶

前漢儒林傳魯徐生善為禮學其弟子公戶滿意為

禮官大夫

公慎

魯有公慎氏聞孔子為政出其淫妻

公房

古今人表有公房皮出自芊姓楚公子房之後

公車

出自秦公子鍼字伯車後世別為公車氏

公言

出姓苑未詳其所自

公金

世本秦公子金之後有公金氏

公獻

出姓苑未詳其所自

公息

呂氏春秋有鄭大夫公息房

公留

出姓苑未詳其所自

公朱

世本曰宋公子朱之後

公旅

出姓苑未詳其所自

公冉

魯叔仲氏家臣有公冉務人

空桐

史記商本子姓其後分封以國為姓故有空桐氏

空桑

英賢傳曰伊尹生於空桑後世氏焉

空相

晉惠帝時空相機殺南平將軍孟槐

工師

其先出自古官治木者以官為氏漢有平悼侯工師

喜子靖侯奴孫執

工婁

左氏傳遂國人四族其一曰工婁氏

紅陽

地理志紅陽漢南陽縣也酷吏尹賞傳曰永始元延
間貴戚驕恣紅陽長仲兄弟交通輕俠藏匿亡命鄧
展曰紅陽姓長仲字也師古曰姓紅陽而兄字長弟
字仲今書長字或作張者後人所增爾一曰紅陽侯
元王之子兄弟長少者誤矣謹按姓書漢紅陽侯劉
富後為紅氏周陽侯趙兼後為周陽氏則紅陽氏之
先亦侯家也今從鄧顏二注

金少曰人々二
卷二
驂夷

左傳驂叔安裔子董父能擾畜龍以事帝舜帝賜氏
曰豢龍封諸驂川驂夷氏其後也杜預注曰驂水上
夷皆董姓

二冬

冬

姓苑曰前燕慕容皝有左司馬冬壽晉史作佟壽未
知孰是

佟

晉書音義徒冬反北燕錄有遼東佟萬以文章知名
晉史燕慕容皝有司馬佟壽

儂

唐西南蠻居廣容之南邕桂之西天寶初黃氏居黃
橙洞與常氏周氏儂氏相唇齒為寇害據十餘州敬
宗時黃氏儂氏據州十八經畧使遣一人詣治所稍
不得意輒侵掠諸州太和之後儂洞最強結南詔之

助懿宗與南詔約和二洞數間敗之邕管節度使辛
謹以美貨啖二洞首領太州刺史黃伯蘊屯洞首領
儂金勒等與之通歡負州又有首領儂金澄儂仲武
與金勒襲黃洞首領黃伯善伯善擊殺金澄唯金勒
遁免後欲舉兵報仇辛謹遣人持牛酒音樂解和并
遺其母衣服母賢者也謂其子曰節度使持物與獠
母非結好也以汝為吾子前日兵敗不自悔復欲動
衆兵忿者必敗吾將為官老婢矣金勒感悟罷兵裔

孫儂智高與弟智忠建忠自廣源州舉兵犯廣南破
州郡仁宗遣大將狄青破逐之

宗

後漢鄧禹以宗歆為車騎將軍又涼州刺史宗漢得
羌降安夷縣長宗延為羌所害又西河太守宗育徙
居河東其孫鳳閣侍郎檢校內史秦客中書令郢國
公楚客司農卿晉客楚客秦客與紀處納朋姦世號
宗紀元和姓纂以為周大夫宗伯之後以官命氏誤

矣宗伯自為複姓

彤魚


古今人表黃帝妃曰彤魚氏生夷鼓

宗伯

周官宗伯之後以官為氏王莽以故漢少府宗伯鳳
為僕射丞相王嘉言鳳經明行修又以為太子少傅
與馬宮表聖王嘉為四師

宗正

南燕錄有宗正謙善卜



--	--	--	--	--	--	--	--

欽定四庫全書

子部

古今姓氏書辨證卷三

四

詳校官中書臣沈鳳輝

侍讀臣孫球覆勘

騰錄貢生臣吳士英

騰錄貢生臣趙珍

欽定四庫全書

古今姓氏書辨證卷三

宋 鄧名世 撰

三鍾

鍾

漢西曹掾鍾皓字季明生郡主簿迪迪生魏定陵侯

繇字元常繇生侍中毓字稚叔二說皆有小誤

按上
有脫

文謹按左傳魯成公七年鄭人囚楚鄖公鍾儀獻于

晉九年晉侯歸鍾儀于楚後七年晉三卻始害伯宗

子州犂奔楚為太宰蓋成公十五年也然則楚有鍾氏
久矣昭王樂尹鍾建乃儀之後而子期又建之孫皆非
出自州犂之後正合為鍾離氏祖而昧子接雖為鍾氏
亦不得為鍾氏祖今宜曰鍾儀之先仕楚以所食邑為
氏則姓系明矣南唐汀州刺史鍾全慕又禮部侍郎鍾
謨會稽人壽春節度使鍾章合淝人生戶部尚書處謙
龍

漢藝文志有梁人龍德注雅琴龍氏九十九篇乃論

治地龍子之後

庸

出自商諸侯之國以國為氏仕衛為世族詩所謂彼
孟庸者也戰國有庸芮齊有庸職

雍

楊文公談苑音平聲

重

後漢耿弇傳有渠師重異注曰重姓也臣謹按少皞

氏裔子重為高辛氏讀平聲

從

七松反

元和姓纂曰東莞從氏漢有將軍從成公

蹤

今開封市人有此姓莫知所自出姓書未有今增入

從

謹按前漢高祖紀高祖命從公與周苛守滎陽師古曰從千容反則從人氏也地里志有從陽必其先以

地為氏

恭

姓源韻譜曰晉申生謚恭世子後人以謚為氏宋政和中嘗詔民姓犯翼祖廟諱者並改為恭

龔

其先共氏避難加龍為龔漢有龔遂姓書云晉大夫龔堅後誤矣晉無龔堅漢渤海龔勝及龔舍避王莽亂不仕謂之楚兩龔後蜀李壽以巴西龔壯謀殺李

期而自立及僭位以安車束帛聘壯為太師壯固辭
特聽縞巾素帶居師友之位

共

謹按春秋時晉有共賜魯有共劉鄭有共仲皆為大
夫漢初封義帝柱國共敖為臨江王敖生尉

鍾離

出自子姓宋威公曾孫伯宗仕晉為三卻所害其子
州犂奔楚食采於鍾離因為氏而世為楚將裔孫

鍾離昧為項羽將二子長曰發居九江仍故姓次曰
接徙長社為鍾氏

鍾吾

出自春秋時子爵小國吳闔廬使執其亡公子燭庸
鍾吾子不可遂伐滅之以國為氏漢尉氏令鍾吾蒼
即其後也

龍丘

謹按王子年拾遺記窮桑氏之國有水屈曲亦如龍

鳳之狀有山盤紆亦如屈龍之勢故有龍山龜山鳳水之目亦因以為姓末代為龍丘氏出班固藝文志封人

出自周官封人之後以世官為氏一云古諸侯封人之後漢有司徒掾封人嬰元和姓纂曰古封畿之職為氏左傳晉有蕭封人誤矣春秋時宋樂懼為呂封人高哀為蕭封人鄭仲足為祭封人潁考叔為潁谷封人如此非一又晉無蕭邑急就篇曰呂氏春秋韓

封人子高

封父

出自夏諸侯封父之後其地汴州封丘縣有封父亭
即其所都周初國滅取其大弓繁弱以封伯禽於魯
子孫遂以國為氏謹按明堂位曰封父龜天子之器
也蓋伯禽初封亦受此賜元和姓纂曰夏殷國名鄭
有封父彌真為大夫

雍人

元和姓纂曰周禮雍人以官為氏魯有雍人高檀見
左傳謹按魯有雍人高檀誤矣周官無雍人魯無雍
人高檀則饗人之名非以雍人為氏也春秋時諸侯
掌膳羞之官或曰饗人所以有別於天子之內饗外
饗而字皆從食如以雍人為姓檀為名則讀襄公二
十八年傳雍人竊更之以驚亦可謂姓饗人而名竊
乎今合駁正

雍丘

晉郭默有將軍雍丘洛蓋其先以所居為氏謹按春秋雍丘在宋鄭之間周封夏禹後於杞杞都雍丘故後世謂雍丘為杞縣

逢公

出自夏商之世諸侯有逢伯及逢公者國於齊土因以國為氏古有善射逢蒙春秋齊有逢丑父楚有逢伯陳有逢滑晉有逢大夫皆知名漢有逢萌前燕有逢羨萌字子康北海都昌人所謂子康大賢所在人

事如父者 北海逢氏漢太尉信後趙秦州刺史碧
唐中書舍人弘敏

逢孫

謹按秦穆公使大夫逢孫戍鄭逢孫密謀取鄭鄭覺
而逐之逢孫奔宋子孫以字為氏

逢侯

史記世家楚懷王有裨將軍逢侯丑姓書舊無此氏
今增入

逢丘

見姓苑

四江

江

太史公曰秦之先嬴姓其後分封以國為氏故有江氏是也春秋時齊小白霸諸侯江人會于貫又會于陽穀楚人怒其親中國故滅江其子孫奔齊為大夫齊悼公拘江說即其人也裔孫德十世孫蕤晉譙郡

太守亢父男生祚祚生統晉黃門侍郎生尚書僕射
靄靄生歆歆生宋右僕射夷夷生宋吏部尚書湛

廐

出自高辛氏才子八人其一曰廐降子孫以字為氏
夏有賢臣虬圉即其後也

邦

出姓苑廣韻曰後魏靄邦氏改為河南邦氏誤矣靄
邦乃靄邦也

龐

出有姬姓姓源韻譜曰襄陽安衆龐氏其家富盛好
為高屋鄉黨榮之號曰龐高屋襄陽記龐德公居峴
山之南未嘗入城府夫妻相敬如賓子字人亦有令
名娶諸葛孔明妹為魏黃門吏部郎生渙晉牂牁太
守又廣漢姜詩娶同郡龐盛女又益州刺史龐芝又
中郎將龐浚援涼州後秦有大將軍左長史龐演魏
尚書統

逢

出自夏商之世諸侯有逢伯及逢公者國於齊土因
以國為氏陳有逢滑晉有逢大夫皆知名前燕有逢
羨萌字子康北海都昌人所謂子康大賢所在人事
如父者北海逢氏漢太尉信後趙秦州刺史碧唐中

書舍人弘敏

按此條辨證已見二冬逢公條內冬韻之逢係本音
江韻之逢音麗一字兩讀而辨證所引則一當必有誤

五支

支

其先月支胡人後為胡氏石勒十八騎中有支屈六唐有
感化軍節度使支祥宋有蘓州吳縣人支詠

移

謹按後漢紀有南郡太守移良承宦官指停楊震棺
露於道側者風俗通曰齊公子雍食采於移其後氏
焉

為

世本晉始平人為勉自稱將軍

媯

出自虞舜生於媯汭以水為姓周武王時有虞遏父者為陶正能利器用王賴之以其先聖之後封其子滿為陳侯復賜姓媯以奉虞帝之祀是為胡公胡公裔孫曰陳威公鮑生太子免鮑弟曰厲公躍莊公林宣公杵臼杵臼生穆公款款生共公朔朔生靈公平國平國生成公午午生哀公弱及公子過公子招弱生悼太子偃師及公子留公子勝偃師生惠公吳吳

生懷公柳柳生閔公越又有五父佗太子禦寇公子
完公子黃皆見於春秋完奔齊為工正食采於田謂
之陳恭仲其卜得繇辭曰有媯之後將育於姜五世
其昌並於正卿八世之後莫之與京果以為姓奔齊
後為田氏五世而陳無宇為齊卿八世而陳常得齊
政常孫田和取齊而代之

隨

出自祁姓陶唐氏之後劉累孫杜伯事周宣王無罪

見殺子隰叔奔晉生士為生會為晉上卿食采於
隨謂之隨會支孫氏焉後漢蘇竟傳有偏將軍隨第
姓纂曰周同姓隨國為氏誤矣隨乃漢東近楚之國
終春秋世國存未嘗為氏

奇

謹按伯奇周大夫尹吉甫之子以孝聞然則奇氏蓋
出自尹氏也又有河南奇氏

岐

陳留風俗傳曰黃帝師岐伯之後唐段秀實與判官
岐靈岳謀殺朱泚迎乘輿不克被害 安化岐氏唐
萬福府統軍岐才慶州人

義

儀 亦作

出自三皇太皞伏羲氏之後為氏

案伏羲氏之後通志別為戲氏魏志

有戲志才

潁川人

宜

姓苑姓纂皆曰隋西南夷有宜縉宜林

儀

出自衛大夫食邑於儀因氏焉一云周官司儀之後
以世官為氏春秋有陳大夫儀行父元和姓纂曰衛
有儀封人誤矣封人非以儀為氏

皮

後漢元初元年先零羌叛敗涼州刺史皮揚於狄道
千姓編曰望出下邳唐末有襄陽皮日休蘇州刺
史生光業光業生元帥府判官文璨文璨生子良仕

兒

廣韻姓源韻譜皆曰出自吳郡有兒生而能語因以
為氏音如之反 河南兒氏後魏官氏志代北賀兒
氏改為兒氏赫連勃勃有鎮東將軍兒真之

離

出自古明目者離婁亦曰離朱黃帝時人風俗通曰
漢有中庶子離常後燕有離班

驪

驪出自姬姓之戎在驪山者因山以為名國以為氏
晉驪戎之國是

訾

音
亥

其先齊大夫食邑於紀之訾城北海都昌縣西訾城
是也後人因以為氏晉趙簡子有家老訾祐又唐有
曹州人訾亮與弟信為中官楊復恭養子因冒其
姓更名守亮守信舊姓書以訾音紫今兩存之唐呂
元膺為京兆尹擒賊訾嘉珍乃賊武元衡者宋滑州

訾氏簡生行行生準準生諱字信道宣和三年進士
又好水川之敗監渭州羊牧隆城鹽酒稅內殿崇班
訾贊死之詔贈成州團練使

卑

謹案後漢后妃傳熹平四年議即卑整上言母以子

貴之義風俗通曰卑氏鄭大夫裨諶之後

案蔡邕胡
太傅碑有

太傅掾
雁門卑整

裨

左傳鄭大夫裨諶謀於野則獲謀於邑則否又裨竈
能知天道晉宣城內史桓彞有長史裨惠自此宣城
郡有裨氏

諱

諶竈之氏亦通作諱

施

出自夏諸侯有施氏嘗以妹喜女桀者國亡以國為
氏周成王封伯禽於魯分以商民七族一曰施氏後

世無聞唯魯國施氏出自姬姓惠公之子尾字施父
生施伯伯孫頃叔生孝叔始以王父字為氏孝叔孫
之常字子常為孔子弟子裔孫又漢博士讎字長卿
又有安州刺史琰太常博士敬本吳興後漢有施延
吳大司馬施績梁施瑩入玉臺集

彌

三輔決錄云漢彌氏新豐人以所居為氏謹案春秋
時瑕謂之彭封彌子必其氏也

池

風俗通曰氏於事者城郭園池是也

眭

音雖

按前漢符節令眭孟魯國蕃人師古曰息隨反今河朔尚有此姓音字皆然而韋昭應劭並云音桂非也今有吳乃音桂爾漢之決錄又不作眭寧可混糅將為一族孟十一世孫固固孫邁生易州刺史逸逸生後魏七兵尚書鎮鎮曾孫燮生北齊國子祭酒仲讓

仲讓生滑州別駕彥通又魏志眭固字白兔殺楊醜
以應袁紹曹公破之於射犬城事出典論燕慕容垂
有中書令眭邃義安後魏有眭邦馬邑有眭夸漢陽
唐考功郎中希文

危

謹按危氏不著於隋唐之前唐末撫州南城人危全
諷據郡為節度使其弟仔昌為信州刺史仔昌失郡
奔錢鏐鏐惡其姓改曰元氏而全諷在撫州後與其

堦鍾正時戰於象牙潭正時執之而并有撫州其族
在臨川有秘書郎傳南城邵武有秘書丞序著作佐
郎雍及危扶

蕃

音皮

元和姓纂曰其先出自魯大夫食邑於蕃因以為氏
後漢黨錮傳有蕃嚮謹按前漢睦孟魯國蕃人師
古姓書云古今人表曰詩所謂蕃維司徒者今代詩
本不從草亦不音皮未知孰是

按經典釋文引白懷
魯國記云陳子游為

魯相蕃子也國人為諱
改曰皮也今附入支韻

郚

謹按左傳趙盾殺公子樂於郚則郚晉地也一名郚
邵必大夫食邑者為氏

支離

姓解曰莊子有支離疏誤矣謹按有支離疏支離叔
支離益皆寓言蓋謂人形之不全者未必人之姓名
也

隨巢

漢藝文志有隨巢子六篇注云墨翟弟子謹按姓書未有此氏而當時有胡非子隨巢子皆師墨氏則隨巢合為人氏

奇斤

後魏官氏志代北有奇斤氏各為奇氏

崎丘

出姓苑

戲陽

出自衛太子蒯瞶之僕有戲陽速者其先以邑為氏
施屠

前漢周勃擊燕得盧綰御史大夫施屠渾都師古曰
姓施屠名渾都姓書未有此氏今增入

斯引

西秦錄有乞伏氏與斯引氏自漠北出陰山

彌且

且一作姐後秦有將軍彌且婆彌且亭立

彌牟

出自姬姓衛大夫公孫彌牟之孫或為彌牟氏

蛇丘

謹按春秋齊人滅遂遂國在濟北漢建為蛇丘縣屬
太山郡受封者因以為氏後漢河內太守蛇丘惑生
重濟北太守女適楊續師古曰蛇音移

訾陬

三皇時諸侯以國為姓帝嚳妃訾陬氏女是也元和姓纂以為訾氏祖誤矣訾陬自為複姓

六脂

脂

京兆脂習字元叔與孔融善每戒融剛直太過必罹世患及融死許下莫敢收者習往撫尸曰文舉舍我死吾何用生為曹公收習欲殺而赦之後至中大夫夷

姓書云齊大夫夷仲年之後誤矣齊僖公之弟年字仲而謚夷生公孫無知其後絕無以夷為氏者謹按周虞人箴曰在帝夷羿冒於原獸晉魏絳論有窮后羿及寒浞曰伯明后寒棄之夷羿收之杜氏曰羿夷姓然則后羿姓夷自虞夏間已有此姓孔子論逸民有夷逸孟子時有墨者夷之皆當為羿後也春秋時有夷國者楚滅之今為亳州城父縣此亦非夷姓所自出也今以虞箴左傳為正

師

風俗通曰樂人瞽者之稱自晉師曠之後始以為氏

漢有東海師中作雅琴師氏八篇

按漢書師中傳言即師曠後

資

謹按今蜀有資州即古資中地

飢

春秋左傳成王封康叔於衛分以商民七族其一曰

飢氏

茨

疾資切周時有茨菴魯人又東觀記曰茨充初舉孝廉之京師同侶馬死舍車持馬相迎鄉里號曰一馬兩車茨子河

尸

謹按左傳周有尸邑在鞏縣西南偃師城

耆

音祈

伊耆之後單為耆氏

伊

後魏有代北人伊毅

弱

音

唐百濟大臣八姓其一曰弱氏

追

左傳晉大夫追喜伐鄭之役以戈殺犬於門中以示
聞暇

惟

金史卷之三
吳氏千姓編曰後魏威帝后有惟氏謹按惟維二氏
皆吳氏所增

纍

風俗通曰嫫祖之後或為纍氏謹按左傳晉七輿大
夫有纍虎

嫫

元和姓纂曰出自西陵氏女嫫祖為黃帝妃後世以
嫫為氏

遺

姓源韻譜曰魯費宰南遺後急就章有遺餘人

葉急章

作遺失餘此作人誤

謹按周禮地官有遺人掌委積者鄭司農

音棄遺之遺必其後以官為氏

夔

音葵

出自芊姓楚子熊摯有疾不可立以國授其弟別封為夔子其後不祀祝融與鬻熊魯僖公二十六年楚滅之子孫以國為氏石虎有太保夔安自天竺徙遼

東主孫逸姚秦司空騰仕後燕

騅

左傳晉七輿大夫有騅歛鄧大夫有騅甥

誰

謹按前漢丙吉傳皇曾孫賴吉得生吉謂守丞誰如
皇孫不當在官使誰如移書京兆尹遣與胡組同送
京兆尹不受乃以歸史良娣之母孟康曰姓誰名如
師古曰名誰如非姓誰也

夷陽

左傳晉厲公嬖臣夷陽五殺三郤傳曰五亦嬖於厲公則五姓夷陽明矣

夷門

元和姓纂曰史記處士侯嬴為夷門抱關卒因氏焉
夷門大梁門也

師宜

元和姓纂曰後漢有南陽人師宜官誤矣謹按晉史

宜官姓師非以師宜為氏其人乃書酒肆中為字得
錢輒減去者

師延

古有師延作瑩篴者世掌樂職因氏焉宋大夫有師
延宜

毗沙

百濟人姓

茨芑

姓苑曰晉有茨芘仲

祁夜

英賢傳云祁大夫後後漢龍驤將軍祁夜豐

伊耆

亦作伊祁帝堯號也後因氏焉禮記明堂位注伊耆氏古天子有天下之號也今姓有伊耆氏者魏孝文時魏懷州民伊祁苟自稱堯後聚衆於重山作亂洛州刺史討滅之

伊力

南涼有前將軍伊力延侯勸禿髮傉檀坑內叛者王
鍾等五千餘人

葵丘

春秋陳留外黃縣東有葵丘大夫食其邑者氏焉英
賢傳古有葵丘欣石季龍將有葵丘直

鳴夷

風俗通范蠡適齊為鳴夷子後人以為氏潛夫論曰

鳴夷子出自子姓宋微子之後說苑曰鳴夷子皮齊
人即范蠡也

欽定四庫全書

古今姓氏書辨證卷四

宋 鄧名世 撰

七之

台

怡音

出自墨台氏去墨為台或云駘氏後改焉

時

齊大夫時子與孟子同時王嘗使留孟子魏鉅鹿時

苗為令留犢於官

思

出姓苑

其

漢功臣表有陽阿齊侯其石

案漢書陽阿作陽河

以郎中騎從

諸侯定楚侯五百戶生安國安國生午皆嗣侯午生

共侯章更封埤山侯生仁有罪國除

丕

古其字

唐魏博大將丕志紹攻德州又有丕志求五代史有

兀元寶

紫元氏一作兀廣韻無此字萬姓統譜歸入四支韻內今附入之韻

期

風俗通楚大夫居期思城因以為氏謹按春秋楚期思公復遂之後有去思單為期氏

旗

出自姜姓齊惠公孫竈字子雅生欒施字子旗後為子旗氏亦或去子為旗氏後漢有旗汎

綦

其音

元和姓纂云河南有綦氏

案魏志綦連氏改為綦氏

蘄

姓苑云蘄春之後以國為氏其地今蘄州是也

詩

後漢馬援傳麓泠縣雒將女徵側嫁為朱鵠人詩索妻諸姓書以為交趾人詩朱鵠誤矣

而音

出自宗大夫彤班之後宗武公伐長狄敗之以門賞

彤班謂之彤門子孫居焉漢功臣表有芒侯彤跖生
昭昭子申尚景帝南宮公主皆嗣侯

婁

欺音

見姓苑

姬

姬姓出自黃帝生於姬水以水為姓黃帝生元囂囂
生蟠極蟠極生高辛是為帝嚳嚳妃姜嫄感巨人跡
生子以為不祥棄之隘巷牛羊避不踐之棄之山中

山人養之棄之寒冰鳥覆翼之姜嫄怪之知其為天子乃收養之名之曰棄堯知其賢才以為大農命其官曰后稷姓之曰姬姬者姓也人本乎祖之義也黃帝為姬姓棄復得之所謂本乎祖也棄為后稷有功堯封之有虞裔孫公劉遷國於豳古公亶父避狄又遷於岐下亶父生王季歷歷生文王昌又作邑於豐稱西伯其子發草商有天下是為周武王自棄至武王十五世矣武王至赧王又三十有八王而秦滅周

姬氏降為庶人或為王氏漢武帝求周後得姬嘉封
周子南君以奉文武之祀至晉劉琨嘗遣將軍姬澹
帥衆十萬討石勒後周有柱國姬願隋有東宮幸臣
姬威唐有水部郎中姬處遜居長安開元中避明皇
帝嫌名改為周氏謹按春秋武王克商成王定之大
封同姓以為諸侯凡五十三國而燕鄭又在其後故
傳曰管蔡邲霍魯衛毛聃邴雍曹滕畢原鄆郈文之
昭也邴晉應韓武之穆也凡蔣邢茅胙祭周公之裔

也又曰虞號焦滑霍楊韓魏皆姬姓又曰秦伯虞仲
太王之昭也號仲號叔王季之穆也今取春秋三傳
國語史記編次姬姓之人凡天子之國二諸侯之國
三十一戎狄之國三其爵謚字名世系莫不備見讀
之者如指諸掌具載春秋四譜及旁行圖云

箕

出自子姓商之季世封其父師為畿內諸侯謂之箕
子其地太原陽邑縣箕城是也武王克商釋箕子囚

訪以洪範而別封於朝鮮後人以國為氏春秋時晉大夫箕鄭箕遺漢西華令箕堪

釐

本僖氏漢時避諱改為釐史記凡僖皆作釐是也後秦有城門校尉釐艷

狸

元和姓纂曰八元季狸之後以王父字為氏謹按狸氏之先出於丹朱自為狸姓不必八元之後

荏

姓解曰人姓也謹按漢地里志東郡有荏平縣王莽改曰功崇應劭曰在荏山之平地又泰山郡有荏縣應劭曰荏山在東北師古曰荏音仕疑切

僖

出自姬姓曹僖公之孫負羈為大夫以祖謚為族氏又其先黃帝之子得姓者十四人一日僖後嗣至商周之際無聞然亦姬姓後也姓苑以曹僖為魯僖蓋

字畫之誤

嬉

國語桀伐有施有施氏以妹嬉女焉韋昭曰嬉姓或作喜乃有施氏姓

熙

出自己姓高陽氏之後有脩及熙帝嘗使脩為元冥熙佐之後世皆以為氏亦見英賢傳

治

平聲

元和姓纂曰出何氏纂文要音遲

蚩

音緋

元和姓纂曰蚩尤之後以國為姓

慈

姓苑曰出自高陽氏才子八人天下謂之八元其一

蒼舒謚慈後世以為氏急就章有慈仁佗

紫王應麟急就章補

注作慈仁化注曰類本作他李本作地

謹按佛書云彌勒最初證得慈

心三昧因號慈氏異時祝髮事浮屠道者皆以慈為姓

如今之稱釋氏此乃異域之言當存而勿論然不著其說則可好奇者或引為華人姓源故辨明之

茲

出自姬姓魯桓公孫曰公孫茲其孫毋還以王父字為氏

司馬

西京雜記曰司馬氏本周史佚後蓋史佚當出於重黎而休父又出於史佚理宜然也春秋晉大夫司馬

齊字女叔謂之司馬叔侯叔侯生司馬叔游叔游裔
孫司馬烏有功於王室司馬彌牟為鄆大夫至漢司馬
遷自其父談世為太史公位次丞相蜀人司馬相如
以文章顯魏大將軍司馬宣王懿字仲達生文王師
師生武王炎代魏命是為晉武帝事具太史公自序
及東西晉史隋唐間舊定河內五姓以司馬氏為一
門貞觀中定懷州河內七姓其一司馬氏

司城

出自子姓宗武公名司空國人避諱改其官為司城
其公族大夫樂喜字子罕生祁字子梁子梁生圉字
子路世為司城以官氏

司空

帝王世紀曰禹為堯司空支孫氏焉晉大夫有司空
靖唐有司空圖司空曙圖字表聖以御史歸隱中條
山時相盧攜寄詩曰姓氏司空貴官班御史崇

司寇

風俗通云蘇忿生為周武王司寇支孫氏焉

司鴻

風俗通古有司鴻荀著書漢有諫大夫司鴻儀

期思

謹按漢地里志汝南郡期思縣故蔣國也春秋時地入於楚楚僭王號其縣尹皆稱公故大夫復遂食邑期思號期思公因以為氏

綦連

北齊綦連猛傳曰其先姬氏因避亂居塞外祁連山以山為姓祁音時蕃語訛故號綦連猶中國言天蓋天山也元和姓纂曰代北人號綦連部因以為姓釐子

世本曰出自釐子觀起之後楚大夫有釐子班

溜丘

溜一作菑其先以所食邑為氏英賢傳齊勇士菑丘許

茲母

元和姓纂曰漢御史茲母常出齊大夫茲母還後誤
矣茲母還魯人也

八微

賁

肥音

又墳肥奔三音

沂相

英賢傳曰魯沂大夫為相因氏焉漢侍御史沂相封

九魚

舉

音舉

姓解曰椒舉之後

案廣韻以諸切音余今入魚韻

漁陽

燕大夫受封漁陽以地為氏漢有少府漁陽鴻

十虞

厨人

元和姓纂曰周官厨人因官為氏宋有厨人濮見釋



例誤矣周官無厨人濮乃宗厨人名或厨邑之人名

濮

邾婁

謹按春秋婁音閭

十一模

瓠音
壺

莊子有瓠巴鼓瑟而游魚出聽

孤竹

元和姓纂曰遼西竹氏出自孤竹君本姜姓成湯封之遼西今支縣竹城是也裔孫伯夷叔齊辭國餓死首陽山子孫以國為孤竹氏亦單稱竹氏謹按後漢書夜郎竹初有女子浣於遼水有三節大竹流入足間聞其中有號聲剖竹視之得一男兒歸而養之及長有才武自立為夜郎侯以竹為姓武帝元鼎六年平南夷為牂柯郡夜郎侯迎降天子賜其王印綬後遂殺之夷獠咸以竹王非血氣所生甚重之求為立

後牂柯太守吳霸以聞天子乃封其三子為侯死配食其父今夜郎縣有竹王三郎神是也

徒人

元和姓纂曰左傳齊有徒人費國語有徒人回誤矣費等皆徒人之以名見者古無徒人氏

徒何

後周柱國太尉李弼賜姓曰徒何氏

菟裘

史記秦嬴之後分封以國為姓有菟裘氏春秋時菟裘為魯邑

菟賴

官氏志菟賴氏一曰菟賴氏後改為河南就氏

十二齊

齊

晉有武邑侯齊琰九世孫抗字遐舉唐德宗宰相又瀛州齊氏有玘生映亦相德宗唐宰相世系表全用

其說止除齊惡豹明兒三人隋唐間有是光又者自
稱齊姜姓後改復舊為齊氏事見孔至雜錄今詳三
說皆誤謹按春秋姬姓衛昭伯長子謚曰齊子蓋戴
公申文公燬之兄也齊子之孫惡始以祖謚為齊氏
惡孫豹為衛司隸大夫以殺孟縶罪為衛所逐春秋
書之曰盜裔孫明仕韓又仕東周以姓見於戰國策則
平恭侯受乃明之孫當齊惡得謚時姜姓齊為大國
未有田和篡取之事豈得以國為姓姓書自應劭何

承天以來相承一誤如齊晉秦楚不考其由皆謂之
氏於國者故姓纂唐表恥齊豹盜臣之名喜太公大
賢之後鑿空傳會皆以齊氏為出姜姓而氏於國不
曰出姬姓而氏於謚後人因循訛謬遂失其本不可
以不辨正昔顏師古注睦孟傳曰近世私譜之文出
於閭巷家自為說事非經典苟引先賢妄相假託無
所取信善乎顏氏之知言也

淀

音現

何氏纂文要曰古提字

提

左傳趙宣子車右提彌明搏檠而殺之姓書未收今

增入

奚

出自任姓夏車正奚仲之後以王父字為氏孔子弟

子奚容蒧字子皙

案孔子弟子奚容子蒧字子皙一作子楷詳此則當為奚容氏蒧誤

作又成陽定侯奚意生嗣侯信元康四年詔復其曾

孫陽陵公乘通 河南奚氏達奚氏改焉

郕

倪音

出自曹姓邾武公封次子於郕是為小邾其地東海
郡郕城是也春秋時小邾穆公之子甲仕宋又奔鄭
始以國氏謂之郕甲

兒

倪音

師古曰音五奚反後漢九真太守兒式

梯

晉書載記西秦建威將軍裒君破彭利和於瀝川姓書未收今增入

犀

出自戰國時魏將犀武之後元和姓纂曰秦有犀首邵氏曰姓書元有此氏不敢削之皆誤矣謹按莊子音義曰犀首魏官名若今虎牙將軍公孫衍嘗為此官非以犀為氏今以犀武為正

泥

世本宗大夫泥卑之後

鮭

音圭

元和姓纂曰中山鮭氏後漢有博士鮭陽鴻修孟氏
易誤矣謹按後漢儒林傳注曰姓鮭陽名鴻鮭音胡
瓦反其字從角或從魚音胡佳反然則鮭無單姓者

注

音圭

南陽消陽注氏漢有大鴻臚注丹字子玉作易論易
家宗之稱為大儒

哇

晉書載記後燕慕容寶時魏伐并州寶引羣臣議於東宮中書令哇邃請深溝高壘以困魏師音義戶圭反姓書未收今增入

蜀

音

梁四公子其一曰蜀閻

毒

音

出姓解

璽音

姓苑曰璽戶圭反

倭音

見姓苑

案字典廣韻俱不載此字疑即都字之誤今附入齊韻

西周

元和姓纂曰周末分為東西二周各以為氏武公世子稱為西周氏

西郭

英賢傳云齊隱者居西郭氏焉漢有謁者僕射西郭
嵩晉有秘書郎西郭陽何承天以為中朝名士

西方

五代史定州蒲城人西方再遇為州校生鄴後唐寧

江軍節度使

按五代史西方再遇為
州軍校此作州校誤

西河

後漢馬援傳有西河子與相馬法則子與姓西河而
姓書遺佚未收今增入

西乞

元和姓纂曰秦將軍百里術字西乞其孫以王父字
為氏

西陵

古侯國也黃帝娶西陵女為妃號曰嫫祖元和姓纂
曰世本春秋時有大夫西陵羔

西樓

出自姒姓夏後杞東樓公之子曰西樓公子孫以號

為氏

西門

唐末宦者西門重遂西門正範西門思恭皆為樞密

中尉

西宮

姓苑元和姓纂皆未詳謹按左傳鄭盜攻執政於西宮之朝鄭人討西宮之難則西宮執政所居以別於太子之東宮而後世氏焉

西王

新序子夏曰禹學於西王國

西鄉

風俗通曰宗大夫西鄉錯之後尸子有隱者西鄉曹

西都

出王符潛夫論

西閭

說苑有西閭過

西素

出傳餘顏複姓錄

奚計盧

河南官氏志奚計盧氏改為索盧氏

